

Date – 06/02/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. ZPM Media Chairman, Revenue Minister Pu B Lalchhanzovan Lengpui leh Sihphir ram, Indian Air Force hnena hralh chungchang chhui tura CBI hnena FIR thehluh an tum chu an thulh leh a ti .
2. Rajya Sabha MP Pu K.Vanlalvenan Union Home Minister Pu Amit Shah a hnenah Lengpui ram Indian Air Force hnena hralh chungchanga thil dik lo awm ngeia lang te chhui turin Central Investigating Agency te thu pe tura ngenna a theh lut.
3. BJP Mizoram President Dr K Beichhua an Mizoram tana Central Sorkar atanga sum hmuh tur a pung hian, VIKSIT BHARAT 2047 an thlir tel a ni tih a ti chianga ngaih a ni a ti.
4. Prime Minister Narendra Modia chuan zirlaite chu exam tura an inbuatsaih dan kalphung chu ring ngam turin a chah.

<><><>

LENGPUI LAND SCAM ISSUE-ZPM

ZPM Media Chairman, Revenue Minister Pu B Lalchhanzovan Lengpui leh Sihphir ram, Indian Air Force hnena hralh chungchang chhui tura CBI hnena FIR thehluk an tum chu an thulh leh a ti a,

A chhan chu Congress party-in CBI Unit, Mizoramah FIR an thehluk tho avangin, ZPM PAC thurawn angin an thehlut leh dawn rih lo a ti.

Vawiin chawhnu khan ZPM office-ah thuthar lakhawmtute hmaah he thu hi sawiin Pu B.LalChhanzova chuan nimpiniah ni 4-a Council of Minister thutkhawm zawh-a IAF hnena ram hralh chungchang an sawiho thu sawiin, Chief Minister chuan Sorkar laiin FIR thehluk chu a kawng hmang lo naa, MNF leh Congress chet an tum loh avangin Media Chairman anihna anga thutlukna siamin, chumi atan chuan inbuatsaihna pawh kalpui nghal niin vawiin tlai dar 2 khan thehlut turin an inpeih fel tawh tih a sawi.

ZPM in FIR thehluk an tum thawm an hriat avangin MNF leh Congress Party chu an che chawp chung chung niin a sawi a, MNF Party-in kalhmang lo deuha CVO hnena an thehluk chuan thehluk an la tum a, amaherawhchu Congress Party in CBI hnenah ngei an thehluk tak avangin ZPM PAC chuan thehluk ve rih loh a rel ta a, Zoram mipui sutthlek enin thehluk ve te pawh a la tul thei a ti.

ZPM Media Chairman chuan Congress in complaint an thehluk chu CBI in chak taka hma la a, sorkarah consent a rawn dil chuan ZPM chu engtik hunah pawh che chhuak turin an in peih a ti a, sorkar pawh che tura ngaih a nih thu a sawi bawk a, Pu B Lalchhanzova chuan he thil ah hian hmalak a nih tur thu Chief Minister a hrilhin, Chief Minister chuan a kut a fai a thu leh hlauh a neih loh thu leh hma la mawp mawp tura a hrilh thu a sawi a ni.



LENGPUI LAND SCAM ISSUE-MNF

Rajya Sabha MP Pu K.Vanlalvena chuan vawiin khan Union Home Minister Pu Amit Shah a hnenah Lengpui ram Indian Air Force hnena hralh chungchanga thil dik lo awm ngeia lang te chhui turin Central Investigating Agency te thu pe tura ngenna a theh lut a.

Pu Vanlalvena chuan Central pawisa IAF te ram leina atana hman a nih dan ah dân bawhchhiatna awm ngeia a lan thu leh diklo taka pawisa dawngtu te chhui chhuak ngei tura a duh thu Home Minister hnenah hian a thlen a ni.

<><><>

LENGPUI LAND SCAM ISSUE-CONG

Mizoram Pradesh Congress Committee MPCC chuan Lengpui Airport ram hralhna cheng vbc 117.9 aṭanga 'manṭang eitu list' puangzar turin Chief Minister hnenah ngenna an thlen a. CBI hnenah General Consent pe turin an ngen bawk.

Congress party Vigilance Cell chuan vawiin khan Chief Minister hnenah lehkha thehlutin, IAF hnena Lengpui ram hralhna man, a ram neitu pawh nilo, cheng vbc 117.9 dawnṅtu a puh Henry Lalremsanga Hlawnmual pawisa dawn aṭanga 'manṭang eitu list' chu mipui hriatah puangzar se an ti a, an thu thehluh ah hian Indian Air force (IAF) in ram an leiah, a ram neitu Pu Rohmingliana'n vbc 70 ram hralhna man a tel lain, ram pawh nei miahlo Pu Henry Lalremsanga Hlawnmual-in vbc 117.9 Lengpui ram hralhna man a tel thung niin an sawi a. Ram neitu nilo Pu Henry Lalremsanga Hlawnmual-in ram hralhna aṭanga a dawn vbc 117.9 chu sorkara thil tithei tak takte hnena sem tur ṭhahnem tak a awm thu lo darh ta chu chhui chiang a, pawisa a sem chhuahna ni ngeia lang, Manṭang eitute list dik tak Zoram mipuite hnena puanzar a nih ngei theih nan hma la turin MPCC chuan Mizoram sorkar an ngen tih a tarlang bawk.

Mizoram Congress Party President, Pu Lal Thanzara chuan Indian Airforce hnena Lengpui Airport bula ram hralh chungchang chhui turin a tul a nih chuan Supreme Court thlen an tum tih vawiin khan a sawi a.

Congress Bhavan-a inkhawmah Pu Lal Thanzara chuan Lengpui Airport bul ram hralh thu-ah a tuihâng hawptu chhui chhuak tura CBI koh luh chauh chu an lungawina a ni lova, an beisei anga CBI in hna an thawk lo a nih chuan, a ṭul ang zelin Delhi lama AICC hotute rawn chungin Supreme Court-ah an kal zel dawn tih a sawi.

<><><>

HIGH COURT ON NH

Nilaini khan Gauhati High Court, Aizawl Bench-a judge pahnih thutna bench chuan Mizoram Truck Drivers Association (MTDA) thu thehluk chungchangah thutlukna siamin Sairang leh Bilkhawthlir inkar kawngpui siamtu contractor chu kumin April thla tawp hma ngei a kawng siamthat hna zo turin a hriattir.

Justice Marli Vankung leh Justice Mridul Kumar Kalita-te thutna bench hiuan Kawnpui leh Sairang inkar kawngpui dinhmun chhe tak chungchanga MTDA-in nikum lama PIL an thehluk chu ngawihtuahna kal zelah Nilaini khan thupek hi a chhuah a. He lai kawng siamtu contractor J. Infratech Ukil Anil Kumar chuan hnathawktu mi 87 Project-1 ah, mi 96 Project 2 ah an chhawr mek thu court a hriattir a. Heng bakah hian Excavator panga, Back hoe loader panga, tipper sawm pathum, roller pasarih, water tanker pali te'n hnathawhna hmun an vil reng thu court hi a hrih a. Court chuan J. Infratech Ltd. chu Bilkhawthlir leh Kolasib inkar kawngpui, Kawnpui leh Khamrang inkar leh Buichali leh Sairang inkar kawng siam thatna-ah chuan theihtawp chhuah tur leh hnathawh leh hmanrua dah belha hman belh zel turin thu a pe a, an hnathawh chu kumin April thla tawp hma ngeia zo turin thu a chhuah bawk a ni.

Court chuan J. Infratech Ltd chu kumin January ni 22-a meeting minute hmanga hrih an nih anga hmanrua belh a nih dan leh hna kalpui hmasawnna chu additional affidavit hmangin thehlut turin thu a pe a. He thubuai hi thla thar March ni 11-ah ngaihtuah leh turin a ruat nghal niin, ukilte chuan an sawi.

<><><>

BJP

Mizoram State BJP President Dr K Beichhua chuan, Union Budget leh Union Budget atanga Mizoram tana hmasawnna sum hmuh tur tlangpui thuthar thehdarhtute nen vawiin khan an sawiho a.

Dr K Beichhua chuan Mizoram tana Central Sorkar atanga sum hmuh tur a pung hian, VIKSIT BHARAT 2047 an thlir tel a ni tih a ti Chiang Hle-a a ngaih thu a sawi a, Mizoram tana tihlawhtlin tawh leh kal mekte tarlangin September ni 13 2025 khan Prime Minister Pu Narendra Modi chuan hmasawnna hnathawh tur Lungphum cheng Vbc 9000 aia tam man a rawn phum a, hei hian railway, kawngpui, energy, sports leh inkalpawh nate a huam a ni a ti.

June ni 30,2025 thleng khan National Highway kawngpui km 1,499 aia thui siam a ni. National Highway km 593-a thui siamna tura ruahman Vbc 11,465 pawm tawh a ti a. September ni 13 khan Prime Minister chuan Bairabi-Sairang rêl kawng thar a rawn hawng a, Indian Railways network chuan a vawikhat nan Aizawl a rawn thlunzawm ve ta a ni a ti. Sairang Railway Station (Aizawl) chu Amrit Bharat Station Scheme hnuaia siamthat leh mek a ni tih a sawi.

Dr Beichhua chuan, Kum 2025 khan kan Prime Minister chuan zirna in tha leh changtlung tak a neih theih nan Residential School, Kawrthah leh Eklavya Model Residential School, Tlangnuam chu a rawn hawng bawh tih sawiin. Khelo India Multipurpose Indoor Hall for Sports Development Tuikual a mi chu lungphum a phum a, thalaite'n infiamna lama tunlai thei ang ber bungrua tha tak takte nena an in zirchhuah theih nana buatsaih a ni a ti.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



RED FEST

Health Minister Pi Lalrinpuii chuan HIV/AIDS hri kai an pun lohna turinn Mizoram dinhmun hriat chian a pawimawh hle a ni a ti.

Aizawla North East Multimedia Campaign (Red Fest) 2026 HIV/AIDS inzirtirna Kut a hmanpuinaah he thu hi sawiin Health Minister chuan, Tlawmngai pawlte leh Kohhran huaihawt thisen pek runpui an buaitsaih thinah te hian mifel tak tak anga vantlangin an ngai leh a hruaitute pawh HIV hrik pai an lo awm thin a ti a, Mizoram dinhmun hriat chian hi a tha in ram tan leh HIV kai tam lutuk tih ziaawm nan a pawimawh hle a ni a ti bawk.

(BYTE of Helath Minister)

Chief Secretary Pu Khilli Ran Meena kaihhruai HIV/AIDS awareness atan buatsaih, North East Multimedia Campaign (Red Fest) ah hian, Pi Lalrinpuii chuan hmarchhak state-te hi HIV/AIDS ah an sang em em a, ram pum huapa HIV hri kai 0 point 43 a nih laiin Mizoram chu 2 point 73 niin mihring awmzat atanga chhuta HIV hri kai tamna ber a ni tih a sawia, a zahthlak a tih thu a sawi bawk.

He hunah hian hmar chhak state hrang hrang - Assam , Sikkim, Tripura, Arunachal Pradesh, Meghalaya, Manipur aiawhte leh Neuhof School Chanmari te’n rimawi hmangin hun an hmang bawk a ni.



PARIKHSA PE CHARCHA

Prime Minister Narendra Modia chuan zirlaite chu exam tura an inbuatsaihdan kalphung chu ring ngam turin a chah. Vawiina Parikhsa Pe Charcha vawi 9-naa zirlaite nen an inkawmna video tihchhuahah he thu hi sawiin Pu Modia chuan exam laia an rilru delh rittu leh rilru tihahute hneh theih dan a hrilh a. Zirlaite chu anmahniin an thiam dan bera an zirlai an zir dan chu ring ngam tura chahin mi pahnih tihdan inang chiah a awm thei ngai lo a ti a. Zirtirtute pawh zirlaite thiam chak dan theuh ngaihven turain a chah bawk a ni.

<><><>

PARIKSHA PE CHARCHA

School Education Minister Dr Vanlalhlana hovin Govt Mizo High School Multipurpose Hall Macdonald Hill-ah Prime Minister Programme Pariksha Pe Charcha 2026 chu live-a thlirho a ni.

He hunah hian School Education Minister chuan kalkhawmte hmaah thusawiin Exam lai hian pressure a san thin avang leh chu chuan zirlai tam takah harsatna a siam thin avangin Psychologist Association-te nen tanghovin helpline siam tum a ni a, tihhlawhtlin theih a nih chuan zirlai tam tak tan a tangkai a beisei thu a sawi. Exam hmachhawn hi thil peihawm loh tak ni mahse puitlinna kawng zawh nan paltlang a ngai a, harsatna paltlang hian chakna min pe a, exam hian chakna min pe thin a ni a ti. Minister chuan kan thluak hi kan hman tam zawh pauh leh a chak a, thluak hi sawizawi a ngai thin tih sawiin Exam hian kan thluak a sawizawi a, a tichak thin a, thluak tihchak turin exam hi a pawimawh a ni a ti. Zirlaite chu lekhazir nasat laia rilru hrehawmna tihziaawm dan turte ngaihtuah thin turin a chah bawk.

<><><>